

იგოეთში, გრაკალსა და სადგურ-მეტეხში საბავშვო ბაღები შენდება

27 თებერვალი 2021

კასპის მუნიციპალიტეტში აქტიურად მიმდინარეობს ახალი საბავშვო ბაღების მშენებლობა. იგოეთში, გრაკალსა და სადგურ-მეტეხში სააღმზრდელო დაწესებულებების სამშენებლო სამუშაოები შიდა ქართლის სახელმწიფო რწმუნებულმა მამუკა სალარიეშვილმა ადგილობრივი თვითმმართველობის წარმომადგენლებთან ერთად დაათვალიერა. მისი თქმით, მშენებლობები შეუფერხებლად მიმდინარეობს და სულ მალე პატარებს თანამედროვე სტანდარტების შესაბამისი საბავშვო ბაღები მოემსახურებათ.

სოფელ იგოეთის საბავშვო ბაღი 60 ბავშვზეა გათვლილი და ახალი სასწავლო წლიდან შეძლებს აღსაზრდელების მიღებას. აღსანიშნავია, რომ სოფელში აქამდე სააღმზრდელო დაწესებულება არ იყო და ბავშვებს სოფელ სამთავისის საბავშვო ბაღით უწევდათ სარგებლობა. სოფელ გრაკალის სკოლამდელი დაწესებულება აღსაზრდელთა ერთ ჯგუფზე შენდება, შენობა აღიჭურვება საჭირო ინვენტარითა და ტექნიკით, ასევე უზრუნველყოფილი იქნება ცენტრალური გათბობით, ვენტილაციის სისტემით, წყალმომარაგებითა და სახანძრო სიგნალიზაციით. გამწვანდება საბავშვო ბაღის ეზო და მოეწყობა სათამაშო მოედანი. ბაღის მშენებლობა მნიშვნელოვანია, რადგან არსებული დღემდე ნაქირავებ შენობაში განთავსებული. რაც შეეხება სადგურ-მეტეხის საბავშვო ბაღს, იგი გათვლილია 50 აღსაზრდელზე და დასრულების შემდეგ შენობა სრულად დააკმაყოფილებს თანამედროვე სტანდარტების მოთხოვნებს. პროექტი შენობის გარდა სპორტულ და საბავშვო მოედნის კეთილმოწყობასაც ითვალისწინებს. დასახლებაში, რომელშიც 200 - მდე ოჯახი ცხოვრობს, უკვე 25 წელია საბავშვო ბაღის შენობა არ ფუნქციონირებს. აღსაზრდელები კასპის №1 საბავშვო ბაღში სპეციალურად გამოყოფილი ტრანსპორტით გადაადგილდებიან და მას მუნიციპალიტეტის მერია აფინანსებს.

სამივე საბავშვო ბაღი ადგილობრივი ბიუჯეტიდან ფინანსდება, რაზეც 2 მილიონ ლარზე მეტია განსაზღვრული. სამშენებლო სამუშაოები მიმდინარე წელს დასრულდება.